

柯柏榮：予故鄉的芳味傷--著

——記囡仔時代安平芳味的

(桃紅字：表聲音內容)

一港捲螺仔風

佇鐵窗外 拍蕘

有淡薄仔鹹鹹的海水味

好玄的鼻仔 伸 長 長

伸過鐵枝仔縫

規身軀的毛管空

雄雄拍開 大力咧 **suh**

足大力咧 **suh**

Suh 遙遠的熟似味

氣味 **tshuā** 阮四界蕘

海頭阿媽咧糲甜粿

黃錦錦的麵粉皮

Khiū-teh-teh 的甜粿

芳芳軟軟 那食那歎

一喙咬落去 頂齒黏下齒

古堡跤 蚵仔煎擔

Tshi-tshi tshāⁿ-tshāⁿ Tshi-tshi tshāⁿ-tshāⁿ

鹹甜的青蚵仔

粉紅的搵料

豆菜 芡蒿仔 韭菜 卵

一盤囡仔記持燒滾滾

記持的芳味會轉蕘

蕘來到觀音亭頭前

周氏蝦捲當出爐

阮的喙瀾滴規路

沿路滴到港仔宮

廟埕的蚵嗲芳閣脆

蚵肉三層黏喙尾

氣味箍過來 蕘過去

小可酸酸 小可甜甜

市仔街的樣仔干

沿仔哺 沿仔行

酸佇喙舌 甜入心肝

城隍廟埕 菜市仔邊
阿母的肉豉仔滾沓沓
一沿烏汁葶泡仔
嘍 嘍 嘍 嘍
煮出陣陣肉燥芳
煮出阿母的痛疼

明明氣味 hiah-ni'h 芳
為何鼻頭 tsiah-ni'h 酸
我倚佇鐵窗內
將鼻仔 kiu 入來
將喙瀾摻目屎
吞落腹肚內

啊！我去予一陣一陣
故鄉的芳味
傷--著